

勘校聲明

(一) 本志翻印以馬君仁元所存舊志爲藍本并由葉君如松楊君巽從葉君元和王君式衡林君一鳴戴君燁光張君長庚楊君道立諸人羅致單行本分別勘校俾斷簡殘篇得以彙成卷帙

(二) 本志前提督學政單德謨所撰序文及雜志叢談中有爲蠹魚所壞者俱缺待查其規制卷數未終疑義塚尙有缺頁嗣後如有檢出無論頁數多寡應再補刊

(三) 本志藝文前後版微有出入如重建文廟記篇前版於今蕭然耗費矣之下且山童其巔之上插國朝用軍興策至急兩稅之徵藏乏儲貯吏斯土者惴惴然也一筆又學師

青水蕭公德政頌碑篇於奉簡書來司我邑教鐸之下虛心獎誘之上插於時倥偬未定人心惶駭其鮮衣怒馬馳騁於通衢者率瞑目而短後露刃而外嚮士多潛入山林談吾伊則以爲怪事望津壁則有若畏途公至一筆後反俱刪去之今從後版又邑令韓常卿狀元林震作鳳山丹竈及紫極宮七言律各一首後版亦刪去之今從前版

(四) 本志擬將印稿圈點付印惟查稿內圈聲字甚多該項字模設爲特刻澆鑄費時殊夥故未照辦閱者諒之

(五) 本志係從潭州三川印書館翻印四百部印刷精美校對無訛洵稱善本留爲續修之參考

民國二十年校者識於恥草別墅

重印長泰縣志序

縣之有志猶國之有史備載事物俾後之覽者知山川形勝人世滄桑及夫民風吏治之良否長泰古稱文物之邦名賢輩出俗美化醕必當時布政諸公甘棠常舍興學勸農有以起之也余自去秋來治斯縣見人民渾樸猶古之遺惟文明落寞里社蕭條昔盛今衰懸殊何甚殆氣運然歟抑亦治失其道歟晨夕公餘每欲披翻縣志考究盛衰之故爲謀興革之方乃搜諸內府闕然無存訪之故家非曰毀於蟲魚則曰失之兵燹噫文獻不足杞宋莫徵良可慨夫茲幸於邑紳馬仁元家得遺藏一部中雖稍缺大致尙全展讀之餘深爲欣慰因念是志始於前明經管張諸先輩次第增修至今日僅存此參差斷簡若再任其

docsriver 文川网
入驻商家 古籍书城

在文川网搜索古籍书城 获取更多电子书

消磨不加整理將何所取鑑於前而垂規于後乎况當民國統
一百廢俱興問俗採風尤余分內亟亟事也爰集士紳重修泰
志特聘劉君光疇葉君如松馬君仁元爲籌備專員羅致單行
各本以補殘缺之文並請馬劉二君將此藍本細加圈點詳爲
勘校先行付梓依式翻印作暫時保存之計至於摺摭遺微徵
求掌故編纂而修輯之正在繼續進行中仍希地方耆宿巖谷
奇英出爲贊助俾臻完善以壯大觀所厚望焉是爲序

中華民國二十一年一月長泰縣縣長丹詔謝梅年撰

寫在本縣志之前

民國十九年秋余奉令長長泰縣教育局疊與修志籌備處諸同人協商鑿印舊志續修新志事卒以種種關係匪特續修失望而翻印的舊志亦遲遲難出梓門殊深惋惜迨民國貳拾壹年四月縣長陳元璋氏以奉省民政廳令略以各縣應組織文獻委員會以該局長爲當然委員

前設修志籌

備處應卽歸併除令修志籌備員等遵辦移交外合行令仰該局長遵照前往接收具報

訓令到局遵卽派員

接收籌劃經費起印舊志在短期間內竟獲告成際此文化落後景氣蕭條的長泰社會往年事蹟復來重新映耀撫今追昔能不起興奮之感

瑋塘葉思恭寫于長泰教育局

民國貳拾壹年八月

單序

秦邑故有志張君懋建宰是邦恪共厥職諸務就理遂以公餘因舊志修輯之發凡起例井井有條工竣釐爲若干卷而來問序於余余自戊辰春○○○

天子○○分巡○○○○○○○○習俗淳澆與夫山○○○○○文章戶口賦役兵制○○○○○○鳥獸蟲魚草木之物產無不思治以目謀以心庶幾克副古廉訪之任以無負

盛朝子惠元元之至意而蒞斯土者其賢否可從茲立判也無如縣別其封郡區其境輜軒所至持大體耳急先務耳欲舉數百里內無不燭照數計瞭如指掌抑亦凜凜有未遑之虞夫自邑而郡而省例皆有志推而上之至一統志要不過以省會郡

邑之志蒼萃採輯而已而省志因○○○○是則邑之有志
非天○○○○乎彼刀筆筐篋之○○○○
其齷齪者○○○○往往師心自用片○○○○
○○故摺撫補苴甚者因文施易剗削其成板而重錄之又或
譏述自期不復俎豆前人規例與一時博雅熟掌故凡此諸弊
益修益劣於吏治非惟無補轉加損焉余故於是編之成而樂
爲之援筆也張君居心誠樸其治泰也于常職外有實意存其
間以廣風化以拯民艱孳孳焉行之永久而不忘茲遂能訂徵
信之書樹經久之業有典有則具見苦心使披覽者一如戶庭
之間几席之近事無鉅細畢寓于篇則是編也豈獨一方沿革
之可考歟文詞該博之可觀歟蓋其爲都人士計至深且悉將

以重範奔祀者按其書善其治也夫衆康阜民殷庶太平有象風俗可登以爲

聖世紀文治于方隅正賢邑宰事而使者之所厚望因察其治狀許其立心之不苟凡以見雅意蒐採信今傳後不徒尋常稱職以求息肩者類非俗吏之所能爲也遂書此以弁其端時

乾隆十六年辛未孟陬穀旦

賜進士出身中憲大夫福建分巡巡海汀漳龍道按察使司副使加一級前工科給事中

欽命巡察臺灣兼提督學政高密單德謨撰

魏序

漳爲閩海要區其隸而分治者七邑長泰居郡之東偏自南唐

置縣迄今前後數百餘載而風土人情聲名文物日新月異所望斟酌損益變而通之與民宜之舍邑志未由考稽歲庚午余自杭郡膺卓薦恭承簡命移守漳州下車以來方欲正己率屬考獻徵文搜郡邑志而披閱之按其規制察其謠俗審其經營措置之方以仰副

聖天子化民成俗一道同風之至意而泰令張君適以邑志修成請序於余余觀邑之有志猶射之有正鵠匠之有準繩也射失正鵠不足稱命中之技匠棄準繩不足列應心之選邑無志書不足備斟酌損益之用張君蒞政之餘留心邑乘招延紳士取舊本而增修之簡而該詳而慎典而有則可謂知所重矣夫鏡往可以知來信今足以傳後是志也泰邑山川之秀政教之

隆人物之盛事蹟之美森然備載於其中豈惟余今日承流宣
化堪資參酌將使後之蒞茲邑者景仰維殷咸敷甘棠之澤產
茲邑者典型在望勉爲桑梓之光彬彬郁郁繼繼承承可於今
卜之矣然則是志之修明是大有造於秦邑也因書數言弁於
簡端時

乾隆十六年歲次辛未仲春吉日

中憲大夫知漳州府事加二級紀錄十五次昆明魏崢撰

張序

秦自南唐置邑舊隸泉歷宋始屬漳爲漳肘腋地讀朱子大全
記漳州職官有云太平興國五年又割泉之長泰以屬焉是秦
之稱引於先賢也名綦重矣歲戊辰余以國子教官來知縣事

乃得朱子行縣仰止亭遺跡於戲泰何幸而得爲朱子過化之地吏茲土者又何幸而得親炙朱子之化乎願竊自惟知一邑事先在知一邑之利若何可興知一邑之弊若何可革而思以覽風俗之淳漓察水利之蓄洩核戶口財賦之裒益溯禮樂刑政之張弛苟非徵文考獻因地制宜又何由善其經理節宣之用耶迺於選食之暇翻閱舊帙則丁卯邑令王君同葉紳所修也撮抄冗濫未爲完善亟爲購求先世遺編得明萬曆間管侯舊本頗稱美善足貽法戒而百餘年來風氣遞新政教不無互異則此日邑志之修容可或緩哉夫志曷以稱尙書序以志謂丘以丘釋衆言其土地所生風氣所宜皆聚此書而漢書且以爲創藏山之祕寶肇刊石之遐貫後之讀者卽於此徵政治得

失焉所係匪尠矣脫其簡而未賅繁而鮮當或考据莫合於史傳網紀未準夫經制皆非所以昭往軌示來轍也今於萬歷乙巳以前悉準諸管志而於管後之葉志則稍訂其繁譌又或因事陟歷村莊咨訪土俗探勝索幽凡盤山複嶺峻谷紆原凹凸嵯峨可喜可愕之地靡不周歷而其間殘碑斷碣金石之遺文有足備稽覈資鑒戒者亦靡弗搜覽用是摺拾紀注復爲訂疑而補缺若規制戶賦兵防人物皆按諸何喬遠閩書證之府志及他吏牘而增修之雖不敢自信一無遺議而集思廣益可告無過庚午春聘平邑賴太史邑耆宿楊君總其成而令諸紳士廣收博採鈎纂其條件踰十月而告成爲帙一十有二合數君子之力哀然成書較之丁卯舊志則稍稍詳且慎焉念吾民世

享

國家昇平之澤文物禮樂日新月異蒸蒸向化自是以往士服詩書敦孝弟教閭巷以法守先型農勤力而朴於野女童工慤益相砥礪以觀厥成而後之君子亦得流覽是編以希踪子朱子化民成俗之遺規夫不於茲有厚望歟

乾隆十五年冬月朔長泰令浙東張懋建書

賴序

邑志與國史相表裏取象於天史則東西兩曜志其經緯乎取譬於地史則朝宗四瀆志其支派乎蓋自錫主任貢地官分職而祝穆方輿孟堅地理奉爲鼻宗後有作者雖曰槌輪大輅積水層冰要亦胸爽漸開文明日啓故統四裔而計之暘昧之谷

明幽之都廣輪無限備極紀載東南之竹不勝書矣然天下者郡國之總也郡國者邑里之積也綜其大於文物攸係而觀其會通覈其詳於耳目所周而得其纖悉則邑志綦要矣秦爲漳郡東邑建於南唐而志書之作自明南海張公廬陵蕭公始也垂五十餘年南陵管公瑞安方公增修之則萬曆甲辰志是也又八十餘年三韓王公邑紳葉公復輯之則今存舊志也夫非以載筆授棗而一邑之風土人物山川名蹟政治財賦以及詞藻災祥一披帙而考鏡列眉師資具在故以是事爲亟亟也歲戊辰甬東介石張侯以鴻博碩儒出宰茲土臥理浹期政通人和廢舉墜修爰稽邑志屈指重修前甲已踰週矣遂進邑紳士父老謀新之而屬其事於余余方家居讀禮集蓼餘生且弇鄙

固陋懼無能爲役顧念泰運桑梓於徵文考獻繼美嗣芳之事
實與有責恭逢

聖天子覃敷文教百度昭明釐定

國史宣揚大猷鼓吹至治余小臣以文學侍從隨諸工僚後執
簡從事成柱下縹帙大一統規模矧邑志又關政治之要異日
輜軒上貢副之蘭臺珥筆是稽此亦先河後海意也遂受幣涓
吉開館於秦亨書院仍舊集新撫事考信刪繁補缺俟蒞政暇
親加筆削而論定之其時相與總其成者則耆宿楊君日煥分
輯者蔡君梅戴君萬選戴君天三張君繼震薛君璠璵戴君黃
茂陳君子道葉君璜諸人彙爲六册分爲十二卷經始春季徂
秋凡六閱月而竣書成侯復授余序之余維賢人君子之立政

docsriver 文川网
入驻商家 古籍书城

在文川网搜索古籍书城 获取更多电子书

也不事其末而於本故執今而弦鼓之不若取昔而表坊之用
法而鞭箠之不若樹風而戒勸之倚勢而格禁之不若因俗而
利導之泰之爲泰依稀千百年矣其視天下彈丸撮爾滄海糠
糝耳然河山如故風會適上賦役物產駸駸乎肩隨於名都上
國而縉紳韋布編戶巾幗忠孝廉恥節義文章後先相望其不
甘自菲薄也如是而蒞斯地者循良最績彼此師師芳規歷歷
合而載之自保大以迄於今爲天文爲地理爲人事鉅者細者
精者粗者奇者變者常者因者革者得者失者分類屬辭別體
殊科非踵事增華變本加厲亦以遠稽近取掛漏爲多敢謂亢
前傳後叅夏書之席入周官之林視國史爲河源濫觴耶後之
覽者其鑒於成憲勿替前徽庶無負纂輯是書之意也夫

賜進士出身翰林院編修丁卯戊辰充

國史館纂修官前翰林院庶吉士加一級在籍

隣治年家世弟賴翰頤頓首拜撰

長秦縣志嘉靖前序

僉事王時槐

遼南道

長秦自南唐置邑迄今垂六百年而舊未有志前令嶺南張子傑夫蒐輯未竟轉官去廬陵蕭子廷宣來始畢力採故牒訪遺老按域圖稽風謠核往蹟質諸鄉士大夫而授簡于邑庠博士弟子使纂綴草成躬校之爲志者十二而邑之輿地食貨宮室學校祀典秩官選舉人物藝文則粲然備矣蕭子詣予請序之予素不工文且未暇也踰年請益力予乃進而語之曰志何爲者也夫爲邑者其譬諸爲家乎家有父焉則縣令是也有子焉則民是也夫愛莫切於鞠子故撫摩之資業之指導之閱閱焉惟懼其不生且成也幸而生矣成矣尤懼其後之無所據以守吾貽家之物而一旦或蕩然以窮也是故筆之于籍焉農桑必

紀其豐瘠室廬必紀其廣袤絲粟錢帛必紀其奇贏器貨臧獲
必紀其名數廟寢墓隧必紀其卜兆舟車販易必紀其饒嗇將
使後之子若孫執是籍而衣食生植永賴此創家之甚艱難而
貽謀之最勤切者所必有也嗟夫通於此則爲邑思以保民而
志所爲輯者其亦猶是而已且夫輿地食貨民所依以生且養
也宮室學校民所恃以安且教也祀典秩官民所藉以衛且理
也選舉人物藝文民所待以振起宣耀也盡舉而志之豈徒以
備彌文耶將吾民生養樂利之具非此焉莫考故一志闕是射
矢的駕脫輻非命中致遠之道也一志成是揆日之於表候氣
之於律固依託憑藉恆必由之也夫長泰當潭之東偏視他邑
差狹重以連海爲壖邇年島夷未殄徵戍責餉之檄聯絡相望

於道長泰之民蕩然寧盡矣今志則成矣必何術以生養樂利之乎不然是爲父者家四壁立矣而徒倚空籍以示子若孫豈得爲善貽後者耶噫繼今來令是邑者尙永念于茲則是志乃不爲徒成也已

嘉靖志跋

知縣蕭廷宣

嘉靖戊午冬長泰志脫稿授諸梓先是邑之薦紳咸以此典上下數百年曠然不舉茲業一旦成之願丐太史筆一言以徵文獻于不朽宣不自分於是力請于當道塘南王老先生蒙可付玉于簡端暨前任凌山張君亦自戶曹屬辭後附焉宣若無容喙者然文以足志是志余翻訂頗詳若徒諉諸商偃一辭弗贊則何以見意矧泰隸漳郡版圖雖尾諸邑之後而其中之髦俊

後先相望首以文章魁京闈甲天下次以事功顯當時在全漳
且稱右出顧志獨闕焉其曷以觀人文以化成哉是錄也創始
則張君凌山協贊則邑博朱君素庵徐君充齋黃君龍白樂成
于何君澗松凌君西橋彙編于蔡葉董王四庠生之手余初蒞
秦獲閱之其間不免因訛襲謬猶爲草創復携其抄付經元王
君屏江考實而修飾之余於公餘少用裁定焉由是輿地食貨
有紀宮室學校有條祀典兵政有章以至秩官選舉之無弗載
人物藝文之無弗詳他如事類弗齊又以雜志終焉一按籍而
人文煥然備矣噫秦之治理雖不盡資於志而有望望治不卽
此可以觀政耶修政以光厥志誠在夫守秦者加之意爾是故
以經輿地而兼貪在所必抑乎以理食貨而漁逋在所必懲乎

以奠宮室而廢圯在所必興乎以崇學校而振剔在所必先乎以明祀典而演兵政也而炳文耀武必在所飭勵乎以核秩官而稽選舉也而秉忠負良必在所激拔乎以辨人物而考藝文也而論世尙友必在所軒輊乎至於吊古推亡弭災銷異則又于雜志不在所鑒戒而敬念之乎是則政舉而志有禪焉塘南老先生曰志則成矣必思所以貽之宣故條其事而繫以貽之之意以庶幾無負是志若外此而謂他有所貽則是事彌文者之用以飾詐也豈余所知哉後之來令者幸相與共圖之故跋

嘉靖志後序

知縣張傑夫

夫邑之有志猶國之有史也國不可一日而無史猶邑不可一日而無志也是故山川之形勝風俗之淳漓人才之隆替政事

之沿革先賢之嘉言善行宦蹟之徽猷偉績咸于是乎備之可
以昭往可以詒來圖治者先務也凡君子之蒞土者必先考閱
邑志所以垂鑒戒動興起效法成能以阜護元元奠固邦本以
副朝廷簡賢牧民之意茲乎藉矣不然如瞽之無相悵悵乎將
何之嘉靖壬子秋余承乏長泰下車之初詢諸故老暨邑人士
咸曰未有成書也問縣治何昉乎曰唐保大某年朔也余曰噫
噫夫縣治自唐以迄于今歷六百餘載而邑志無修此非闕典
歟豈昔人以邑褊地僻鄙夷之而不屑爲抑亦蒞職者傳郵之
迭代而無違於此也秦潭下邑也在昔聞人詰士登科第者後
先踵望歷至今羣彥譽髦濟濟郁郁隆乎躋矣茲非人文之邦
乎爰周爰諏問政於俗問俗於野問興革於民又得生員葉桃

蔡壇輩所爲記錄者而參觀之集思廣益宣猷協政於是乎稍
稍稱治擬纂是志未遑也越乙卯謀諸司教素庵朱君充齋徐
君龍白黃君將以圖是舉適以供役場屋後聞叨轉之報是役
鬱鬱而未成也予將戒行曰設余不修後將漸盡而無聞矣可
但已乎於是請諸督學星野盧公報曰可乃以其役付于當事
君子而以筆屬之素庵君子不揆譎陋竊附數言于末俾後之
蒞茲土者有所稽焉

萬曆志前序

知縣方應時

古列國各有史官掌記時事今縣志卽古國史也故事無巨細
無美惡例得備書之用垂法誠俾鏡古者油然而興起此志意
也泰有志舊矣顧事以時殊政由俗革其間張弛損益異制繁

簡寬猛異宜匪輯而新之奚以作訓哉余承乏二年于茲慮前志多缺幸老于典故有廬王二先生在乃禮聘二先生主其事庠生郭復陽相與考訂之志成二先生屬余序夫二先生良史才也得藉以光典籍垂且不朽矣余不佞敢當作者哉然竊于斯有深感焉夫海內所稱名邦鉅邑者豈云延袤之廣物產之精也乎謂有名人雋士出乎其間則重有賢人君子爲之宣其教令則重匪是則雄都若虛邑也奚足貴哉秦潭之編邑也余始至徧于羣祀見朱夫子祠焉問之曰是嘗大造於茲士夫紫陽去今三百有餘載而潭之人士尸而祝之如一日何其風之遠也鄒魯之遺教在人心也及召諸父老訪故事各往往稱其先哲若黃荅林與唐諸君子其文章勳業高節懿行津津不置

非以其挺然傑出爲足以勵世風也乎夫標的在前則決拾者衆有鄉之先哲而民行不興是茲土人士之怠也觀名賢之過化而教令職事之不共非有司之過乎余方勗茲土人士而且慮無以自勗乃藉名筆輯遺事補其殘缺以成一邑典故俾按籍者從而論之曰某鄉先生賢者也顯者也不爵而聲稱籍籍者也其欣然動景行之思乎又將指守土者而論之曰某撫我者某虐我者某嚙嚙碌碌漠然無欣戚於我者豈不大可懼哉夫懼則修思則奮踵先哲之芳猷而行多君子仰名賢之遺化而邦有典刑則令與邑人士均足重焉而秦可稱雄上國矣豈褊小云乎哉余樂觀斯志之成而因論其所由重者期與邑人士交相勗也若夫山川之形勝風俗之淳漓兵農財賦之盛衰

祀典宇廨之沿革二先生已條具之故不復論云

萬歷志前序

乙巳年

知縣管 橘

在昔輪軒周巡里道每志其溝封廣輪衍隰名物質文升降之數上之副在蘭臺太史氏集而成一家言則志者史之支也史氏賴以記也積縣以知郡積郡以知國積國以知天下幅員之廣合若指掌三畝之宮隱不能悉無所病諸病諸蹟也義軒縣邇緇素具存杞宋無徵文獻不足無所病諸病諸蹟也今之縣由古之國也古者國有史書其風教被習謠俗喜好陵谷遷移之故與夫生植氣候觀聞之奇靡不畢具謨烈啓佑實繁有臚令前人垂之後人墜之前者世遠則難稽後者師心則不繼其蒸蹟也猶無徵也武安之有志也自張君傑夫始迄於今蓋五

docsriver 文川网
入驻商家 古籍书城

在文川网搜索古籍书城 获取更多电子书

週星矣卽方君應時重輯亦既有年不佞橋承乏幾六載邑鄉紳父老及子弟數陳言志當新時欲舉行而適被內徵之命躊蹰不能決因請于太尊方公報曰可乃聘諸縉紳先生邑廣文主其事而輯諸生叅訂之語曰不知爲吏視已成事安取是一切而更張之是鑿垣也所虞者柱膠則宮商不應步餘而差數成閨知守而不知變是繫匏也鴻明鬯而卿喬朗由庚闕而花藿簇視其山川鬱何芊芊淵雲之彥挺生鵠起其階視北斗冠柱後惠文者珮聲相觸不佞得以父事若而人兄事若而人雖其英哲之並驅哉亦時運然也且緋衣之使乘傳而過昔之荒谷今爲潺源昔之礫礪今爲驪鏡詩不云乎周原膺膺董荼如飴若乃琳宮寶地甲於中原琅玕竹箭高視上國魚魚雅雅翼

翼如也徵所聞於所見猶都之與鄙夫此彈丸之區擊柝之聲
相聞而居渾要害征繕之力日懼不殫諸所議鼎議革皆酌諸
縉紳先生言及父老子弟之所敷陳其爲燕函粵縛者政其爲
蓬穀規磨者也故曰志者記也記其可傳者以俟其不可傳者
蓋夫人而能爲傳也豈縣志之意也有執斯志而罪我曰夫夫
避蓬廬之譏者也余亦何辭觀之天有時以煦有時以肅秋容
入戶霜雪凌冽天且不違况爲邑者剗剗一邑之命利害判于
斯須悲愉係於煦吸德則其長也不德則其仇也而能以專一
行之乎至於窮而變變而通潤澤以盡美觀化以盡宜余謝不
敏敢以俟後之君子

後序

教諭鄭洪圖